

LOGJICHE E POLITICHE: L'AGÂR DI TESSITORI

La logjiche e la politiche a fasin part de filosofie, juste come che la piore e il madrac o il poleç e il vidul a fasin part de bestiologjie, e la meniche e la burale a jentrin inte botaniche.

Cui che no si fos inacuart prime, al pò inacuarzisi cumò, tignint daûr aes polemichis sul cont de autonomie furlane.

Il deputât T. Tessitori al à publicât un document par mostrâ lis tapis che e à fat la cuestion de Regjon Furlane, d'in chês volte che e je stade dismote, fintremai al ricognossiment de Assemblee Costituent. Ma plui di dut par mostrâ che lui personalmentri *"nol à mai bandonât il prin agâr e che al è stât simpri fedêl a chês diretivis che al veve segnadis inmò tal lontan 1945"*. In realtât - lassant di bande l'impuartance storiche de documentazion - a lei la premesse di chel librut si capissin altris cjossis: che l'alfîr de autonomie furlane, scaturît des vuacadis di cuatri sei compagns di profession, al à pôre di jessi lât masse indenant e al cîr di scusâsi e di fâ capî che al à fat ce che al à fat par no pierdi dut e se al fos stât pussibil, par so cont, il Friûl al varès vude nome l'autonomie normâl; e che intai ambients *"responsabii"*, falsant la realtât de nestre situazion etniche e i numars des statistichis, si intindarès di ridusi dute la specialitât dal nestri statût regjonâl a une sedon di panadute lamie.

Sul proposit de fedeltât dal on. Tessitori aes sôs primis diretivis, a judicâ de sô opare, si pò ricognossi che in definitive le à mantignude (il procès aes intenzions nol è afâr nestri), ma il libri che al à publicât al fasarès nassi cualchi scrupul contrari. L'autonomie, come che lui la veve deliniade in chel biel studi publicât su *"Libertà"* il mêis di lui dal 1945 e come che la spiegà ancje dopo in diviersis ocasions, no je chês autonomie normâl che la Costituent e à smolât *"obtorto collo"* aes regjons talianis. Nome cuntun statût particolâr si podarès duncje rivâ a chês misure di autoguvier regjonâl che il deputât democristian al veve disegnade cuant che nol jere inmò ufizialmentri democristian: ma cuntun statût metût jù cun man salde e risolude, cence che tremin i zenoi o che si imbramissin i dêts. E cheste e sarès verementri coerence.

Noaltris che o sin talmentri *"in re publica jejuni zuns di politiche"* che o lin nome daûr de logjiche, cence adataments aes contingjencis, o resonìn cussì: o cheste autonomie regjonâl e je un ben, come che a sostegnin i republicans e i democristians; alore plui a'nd è e miôr al è: il ben nol va mai parsore. O che e je un mâl, come che a mostrin di crodi i *"ultrà"*, e alore e va metude de bande

dal dut e si à di adatâsi a chê cjastronarie anacronistiche, camoristiche, vergognose che e je la burocrazie amministrative dal guvier talian, anzit dal guvier fassist.

La misure plui largje o plui strete dal autoguvier regjonâl no à nissune influence sul unitât politiche ni sul economie gjenerâl, ni su la difese teritoriâl, ni sui rapuarts cun altris Stâts, parcè che chestis cuestions a restin in ogni câs di competence dal guvier centrâl. Lis pôris dai nazionaliscj gurizans e nostrans e ducj i lôr resonaments, se no dipendin di interès personâi, a dipendin di une crisi sentimentâl causade de situazion di vuê: ni noaltris, ni Rome, ni lis mozions, ni lis dimostrazions bagnadis di sanc, no puedin puartâ rimiedi a cheste lôr fiere. Il timp la vuarirà o che ur darà reson, ma nissune limitazion des prerogativis autonomistichis no pò zovâur e nissun slargjament nol pò fâur dam: cui che al à frapât un poleâr al è dibant che si fassi il çarneli.

E alore, secont la logjiche, nol è il parcè di domandâ perdon a nissun, ni di scusâsi denant di cualchi emerit voltebandiere, ni di cedi teren inte campagne pe nestre libertât. Al sarà, salacor, convenient secont la politiche... Ma alore no si à di fevelâ di coerence e di "agârs".

josef marchet - Patrie dal Friûl 1947